

HEXENREDE 2020

Hallo und hellau ihr liebe Narraleit,
mir send ganz im Glück und vooooler Fraid,
denn mir hand Geburtstag, werrat heuer 30 Jahr,
es grüßt euch herzlich die ganze Hexaschar.

I ka's gar net glauba, ja des ka doch net sei,
send wirklich scho 30 Jaur vorbei?
Guggat a dia Männer, dia mir hand in osrer G'walt,
a baar von deane send no net amal so alt.
Aber zu allererschd a Lob an eich Frau,
i sah scho, auf eich ka ma halt baua,
Ihr sehad guad aus, werrad emmer scheaner ond besser,
dau ka'sch des Männervolk dau donda doch komplett
vergessa.
Schultes, sag selber, des isch doch klar,
dass bei sodde Männer d'Eiwohnerzahl et steiga ka.
Dr oi hat koine Haur mehr aufm Kopf,
dau, am andra ds'Zuig aus dr Nas raustropft.
Dr Nägschde, der hat kromme Haxa,
der nebadra, der macht bloß Faxe.
Gucks bloß a, dia schiache Gsella,
dätsch du als Frau von deane ebbes wella?

Doch jetzt gadds los, mir wellad berichda,
über altes und neies, vielleicht sends au G'schichda ??
Schultes, horch ganz genau na,
was ma als Hex so alles erleba ka.

Jetzt gugg mr aber nomal na zu deane Mannsbilder da
donda. Was dengad ihr, warum dia heit an Stroahuat
auf hand?

Hexe → weiß ma's
Hexe → ka ma's wissa
Hexe → darf ma's überhaupt wissa
Schultes → i mechds scho wissa, aber mir saids ja
koiner

I sags dr Schultes, horch mal her ...

Du hasch di beworba, Marcus, des isch ja a Traum,
beim Ministerium für da Ländliche Raum,
mit am Landeswettbewerb „Bada-Würddaberg blüht“,
isch ma sehr um Artenvielfalt bemüht.
Net bloß Obstbeim, Bloamawiesa, Insektahotel,
noi, mir brauchad „Männer“ als Natur-Modell.
Nachhaltigkeit isch scheins au bei deane wichtig,
als Versuchsobjekte send dia bei ons grad richtig.
Mir Hexa machat dau an Kreidergarda im ganz groaße
Stil,
mit guadam Saatguat, mei, du, dau brauch mr fei viel,
weil wenn dia Männer deant et recht spura,
gibt's dann bei ons Hexakreider für dia Kreatura,
mir machat se gefügig mit Senf ond mit Dill,
a alts Sprichwort sagt: „dau macht dr Mann was Frau
will“,

zwichanei Salbeiblätter für a langs Läba,
deant mir deane nadierlich au reichlich gäba.
Dia basset doch super nei in osran Hexagarda,
Schultes, auf a Antwort vom Ministerium brauchsch du
nemme warda,
weil, mit deam Konzept, i schwätz fei koin Scheiß,
gwennat mir auf jeden Fall den 1. Preis.

Hat jemand a Idee, wo mir Hexa ons nach am Fasching
so romtreiba werrat?

Hexe → weiß ma's
Hexe → ka ma's wissa
Hexe → darf ma's überhaupt wissa
Schultes → i mechds scho wissa, aber mir saids ja
koiner

I sags dr Schultes, horch mal her ...

Ja was han i ghört, ka des denn sei?
A Pumptrack kommt en osra Städtle nei?
I gebs zua, i han missa guugla, wia ma dau so duat,
des isch für jong ond alt ... des fend i schomal guat.
Dann darf ma net trabba, sondern bloß schwäba,
ja was besseres duats doch für o's Hexa net gäba,
des isch voll subber, mir kennats kaum fassa,
Marcus, dau werat mir scho au mal a paar fahra lassa.
Glei bei dr Eröffnung send mir mit drbei,
du lädsch ja bestimmt an haufa Leit dr'zua ei,
der Preis isch uns sicher mit osre Besa,
über ons Hexa wird ma no so manches lesa.

Im Blättle isch gschdanda, dass ds Wasser ond ds
Abwasser scho wieder nauf ganga isch.
Wissad ihr scho au, was dau passiera ka?

Hexe → weiß ma's
Hexe → ka ma's wissa
Hexe → darf ma's überhaupt wissa
Schultes → i mechds scho wissa, aber mir saids ja
koiner

I sags dr Schultes, horch mal her ...

Zum Beispiel beim Abwasser, des wird emmer dreister,
ma ka sich d's Bada ja bald nemme leista.
Ond was dao no kommt, des wirsch du ja wissa,
na'gschwenkt wird nemme nach jedem Pissa,
d'Gloider werrat nemme gwascha,
d's Regawasser sammelt ma en Flascha,
ond bei meiner Onderhos denk i mir doch,
ha, dia duats doch nomal a Woch.
Kurzom des End vom Liad isch abzomsea,
en'd Seel nei duat mir der Gedanke wea,
wenn ma bedenkt, des nette Städtle,

on nau a soddigs uguats Gschmäcke,
von deam Geld kasch glei a Umgehungsstraoß baua,
weil bei deam Gstank werat sich d'Leit sowieso nemme
in d'City neitraua.

.....
Gebühra gangat nauf ond trotzdem steigt emmer no dia
Pro-Kopf-Verschuldung. Moinat ihr, dass dr Schultes ds
spara erst no lerna muss?

Hexe → weiß ma's
Hexe → ka ma's wissa
Hexe → darf ma's überhaupt wissa
Schultes → i mechds scho wissa, aber mir saids ja
koiner

Schultes, mir sagat dir wia des gat ... horch mal her ...

Du als Stadtoberhaupt bisch angehalda,
onsre Haushaltsgelder gut zu verwalda.
Drom an Vorschlag für di, so ganz im Vertraua,
wia du kennedeschd dia Schulda wieder abbaua.

Zum Beispiel beim nägschda Kenderfest von der Stadt,
mei, liabe Leit, des wär doch glatt.
Du Schultes, kennetesoch vom Grill Würstla verkaufa,
deine Gmoidrät dädat mit Losmerkla laufa,
Verwaltung ond Bauhof als freiwillige Helfer,
dau kämat rei, dia fehlende Gelder.
Mir Hexa, dädat für Stimmung sorga,
wenns sei muaß, bis zom früha Morga.
Ond no was fällt mir zom Thema spara ei,
guck mal im Rathaus in dia Vitrine von der Firma Walther
nei.
Schea isch se eigrichtet, an haufa Maschina hasch
gsammelt,
hols liaber raus, bevor no oina dau dren vergammelt,
denn mir fendat, so schlecht send dia Maschina früher
gar net gwea,
mit so ra Rechamaschee hats lang net so viel Kassalecher
gea,
dia send zwar oldschool, aber net schlecht,
du wirsch sea, au dau hand mir Hexa wieder mal recht.

Weil als echte Schwäbin sag i dir auf jeden Fall,
Spara ka ma ieberall !

.....
Liebe Leut, wissat ihr was i an dere Stelle au no saga
will?

Hexe → weiß ma's
Hexe → ka ma's wissa
Hexe → darf ma's überhaupt wissa
Schultes → i mechds scho wissa, aber mir saids ja
koiner

Also:

Von de ledschde 30 Jaur ka der ja net viel wissa,
denn vor 30 Jaur hat der no net viel grissa.
Mir Hexa dr'gega hand in derer Zeit so manchen Fehler
auf'deckt,
ond gell Stotzinger, domme Sacha hand mir emmer ganz
schnell checkt.
Mir send auf d'Strass' wenns was zum klaga geba hat,
mei, da war onser Stadtrat manchmal ganz schee platt,
mir hand so manch'n Brauda scho im Vorfeld grocha,
bevor dia selber des hand em Sitzungssaal besprocha.
Müllverbrennung, Legoland,
Ballsporthall ond Urnawand.
Lonido und Steuergelder, neuer Stadtkern,
Bauplatzfelder, Archäopark, Jahrtausendwende,
osra Chronik, dia spricht Bände.
Des oine, Kerle, des versprechat mir,
auf d' Fenger guckat mir au dir.
Glaub net, du kennsch em Sessel denna chilla,
Schultes, mir Hexa, mir send wie Bazilla.
Ons kriagsch du fei so schnell net los,
onser Hexahaufa der isch groß.
O'sre Auga, Bürschle, dia send überall,
mir bleibat dra an jedem int'ressanda Fall.
Vorerscht hasch du sowieso nix mehr zum saga,
gell Hexa, des soll der Kerle ja net waga.

Ond sowieso, ond des isch gar net gloga,
bis Aschermittwoch bisch du deines Amts enthoba.
Erscht dann, s'fällt ons ja scho sauschwer,
gebat mir dr Raudhausschlüssel wieder her.

Heit, da lassad mir mal alle fünfe grade sei,
Leit, mir ladet eich jetzt herzlich ei,
heit wird gfeirat, danzt ond glacht
heit wird die Nacht zum Tag gemacht.

Stotzinger Hex
Stotzinger Hex Hex
Stotzinger Hex Hex Hex



Doch zerscht, des isch ja allgemein bekannt,
kommt jetzt onser Hexa-Jubiläumstanz.
Bassat guat auf, dann werad ihr glei säha,
mir deant uns dieses Jahr ganz oft dräha.
In fünfer Schritt hand mir zammagfasst,
was musikalisch so für jed's Jaor basst.
Osre kloine Hexla hebat Schilder nauf,
dau statt dia Jahreszahl dann drauf.

Jetzt gats los, jetzt lass mrs kracha liabe Leit, mir
Stotzinger Hexa wünschat eich drzu so recht viel Freid.



Stotzinger Hex
Stotzinger Hex Hex
Stotzinger Hex Hex Hex